

Endischavla radunonza generala dil

**Forum cultural Tujetsch**

Venderdis, ils 21 da november 2008, allas 20.00 uras el Hotel Mira, Sedrun

**Protocol**

**1. Beinvegns e presenza**

Allas uras fixadas astga il president dil forum, André Schmid, beneventar cun plascher 17 persunas, ch'han en tutta aura d'unviern, anflau per bien, temps ed interess da prender part alla radunonza e s'interessar per la lavur dil Forum cultural Tujetsch. Perstgisas sa il president indicar las suandontas: president communal Pancrazi Berther, Seppa Schmet-Pally e Bruno Berther.

**2. Dumbravuschs**

Sco dumbravuschs vegn scolast Beni Hendry nominaus ed eligius unanimamein.

**3. Prelecziun ed approbaziun dil protocol dalla radunonza generala dils 19 d'october 07**

Il protocol digl anteriur actuar Bruno Berther vegn prelegius ed approbaus cun admitter in cordial engraziament per la redacziun da tal.

**4. Rapport annual 2007/08**

Il rapport annual ei cumparius ella Tuatschina nr. 23. Il president André Schmid fa cuortamein attents sin ils schabetgs ed eveniments occurrì el ravugl dil forum.

*Fiasta da giubileum: 10 onns Forum cultural Tujetsch*

En rama d'ina mudesta festività ei sco eveniment unic vegniu presentau il tom I dallas Ovras da pader Baseli Berther. Plinavon ei quella sera la biblioteca da Vic Hendry ufficialmein vegnida surdada entras il scribent tuatschin alla vischnaunca da Tujetsch.

*Descripziun dalla Val Tujetsch*

Sin iniziativa da dunna Scholian, sustenida digl archivar cantunal Ursus Brunold e Norbert Berther, vegn la voluminusa ovra da pader Placi a Spescha davart la Val Tujetsch publicada. Il forum ha, sin incumbensa dalla suprastanza communal, examinau quella idea e proponiu a quella da sustener quella grondiusa publicaziun per la vischnaunca. L'ovra duei cumparer 2009.

*L'antieriura ucliva da Giuv*

Giuv, la patria da Gionet da Giuv, in dils sulets mistichers dalla regiun, igl uclaun bandunau suenter l'entschatta dil 19avel tschentaner. Quella ucliva ha tec a tec piars siu maletg. Ussen secattan aunc leu dus baghetgs e la caplutta da s.Bistgaun. Il forum s'engascha per mantener quels dus baghetgs ed eventualmein postar in faner el contuorn.

*Notg da film*

La notg da film ha carmelau ina roschada d'amateurs dalla historia tuatschina. Il film documentar dalla erecziun dil conduct ault atras la Val Mila ha fascinau ils presents. La cronica da Bruno Berther, Rueras ha frestgentau il vargau ed il film dad Ivo e Laura ha delectau il publicum e demussau danovamein tgei ch'ei pusseivel da far cun scolars e scolaras dil scalem ault.

*Calender 2008*

Il calender dil forum ei daventaus tradiziun. Il calender 2008, cun fotos dad Adalgott Berther ha danovamein giu bien esit.

*Excursiun*

L'excursiun previda enta Val s.Pieder ei muort memia pintga partizipaziun buca vegnida menada atras. Il rapport dil president vegn renconuschiu cun applaus ed approbaziun unanima.

**5. Rendaquen e rapport dalla revisura**

La cassiera Nicolina Cathomen presenta il quen digl onn 2007/08. Ella explichescha las entradas e expensas essenzialas. Las grondas entradas sebasan sin las contribuziuns e la vendita dil calender. La bilanza dil quen croda ora sco suonda:

**Survesta dil quen**

**Survesta quen ordinari:**

Entradas

34'402.20

Expensas 29'667.95

Fatg anavon 4'734.25

Bilanza:

Saldo dils 15-10-2007 19'072.50

Saldo dils 01-11-2008 23'806.75

Fatg anavon 4'734.25

#### **Survesta quen conto Putnengia:**

Entradas (2003-2008) 160'501.30

Expensas 119'983.45

Saldo per ils 1-11-2008 40'577.60

Bilanza:

Saldo dils 15-10-2007 40'297.00

Saldo dils 01-11-2008 40'577.60

Fatg anavon 280.60

La revisura Barla Monego-Venzin ha repassau il quen e controllau entradas ed expensas. Alla radunonza propona ella dad acceptar il quen presentau cun dar scarica a cassiera e suprastonza. Ils presents demuossan quei unanimamein.

#### **6. Contribuziun annuala**

La contribuziun annuala, 30.- frs per commembers/ras activas e passivs e contribuziun voluntaria per fautors, vegn sin proposta dalla suprastonza, laschada sco tochen dacheu.

#### **7. Projects e program da lavur 2008/09**

##### *Casti da Putnengia*

Muort desinteress ni buca peda da nies projectader sgr. Casanova ei la restauraziun s'entardada. Danovamein vegn sgr. Högl a surprender la nova projectaziun pretendida dil cantun suenter las novas anfladas egl ost dalla ruina. Ton che igl ei previu da cuntinuar cun las lavurs igl onn 2009. La finaziun duess esser garantida culs mettels ch'ei avon maun e cun la contribuziun restonta dil cantun. Sco terminaziun ei era previu da realisar ina senda tier il casti e montar ina tabla d'informaziun.

##### *Giuv*

Suenter la lavur da planisaziun eis ei previu da cuvieren ils tetgs dils dus baghetgs cun slondas e procurar per in emperneivel contuorn. In baghetg ei en possess dalla pleiv e l'auter privats. Plinavon ei previu da dislocar in faner da giu Las Rueras si Giuv. Ord il miez croda la damonda dil liug da plazzar il faner e schebein ei seigi in summa pusseivel da plazzar in faner a Giuv. Las restonzas da fundaments ein idealas per plazzar e davart las lubientschas da plazzar ei dad intervegnir tier las autoritads communals e tiel cantun.

##### *Beinvegni Svizra*

Cun la fin digl onn 2008 terminescha quei project. L'idea da realisar ina senda romontscha ei vegnida sustenida dil forum, ton che quei project vegn persequitau vinavon e grazia ad ina contribuziun eis ella era realisabla. En discussiun stattan tablas cun in text romontsch e tudestg, postai en loghens e sin baghetgs per liung dalla senda che meina dalla staziun da Rueras entochen alla staziun dalla VMG a Mustér. Damai che tablas ein exponidas a vandalissem, stattan ussa en discussiun mo petgas numeradas cun la pusseivladad da tedlar il text giud ina apparatura tecnica, che mintgin sa retrer tier il biro da Turissem Sedrun/Mustér.

Pigl avegnir ei previu ulteriuras sendas, per semeglia cul tema: detgas e praulas, edifecis sacralis (spiritualitad), edifecis culturals, fauna e flora ed auter. Ord il miez croda l'idea da far diever dallas pusseivladas tecnicis cun il GPS.

Il president, en funcziun da genau da vischnaunca, relata davart ina senda per seniors, che duei vegnir realisada sil trassé vegl dalla viafier Furca Alpsu dil Pass Alpsu a Tschamut.

*Tom II cun ovras da pader Baseli Berther*

El decuors dall'entschatta digl onn 2009 cumpara il tom II cun ovras da pader Baseli che relattan davart schabetgs ord la historia da nies cumin e la vischnaunca da Mustér. Plinavon cuntegn el ina voluminusa biografia da nies pader da Dieni ed entginas poesias ord sia plema. La finaziaziun vegn garantida cun contribuziuns recaltgadas d'instituziuns, dil cantun e las vischnauncas dalla Cadi e cun mieds dil forum ord vendita dil tom I da pader Baseli Berther. La presentaziun duei succeder en claustra da Mustér.

*Excursiun pils commembers/ras*

Era uonn vul il forum promover igl emprender d'enconuscher ina outra cultura cun danovamein envidar in e scadin ad ina excursiun enta Val per emprender d'enconuscher la cultura dils Gualsers.

*Pagina d'internet*

Il forum cultural ha realisau ina pagina d'internet cun informaziuns davart nies sribent indigen Vic Hendry. Quella lavur duei cuntinuar.

*Calender 2009 e 2010*

Il calender ei program e tradiziun pil forum. Il calender 2009 ei gest cumparius cun fotografias dad Eugen Berther e per igl onn 2010 ei danovamein previu l'ediziun d'in tal.

**9. Varia**

Tumaisch Valier fa attents sin la digren dalla enconuschientscha dils nums locals da nossa val. La suprastonza dil forum persequitescha gia dapi liung temps quella caussa e pren en vesta dad eleger ina grupp da lavur per persequitar quella impurtonta part culturala da nossa vischnaunca e studegiar co realisar ina inventarisaziun dils nums sin cartas ni sin fotografias. Vigeli Giossi fa attents sin la registraziun dils nums locals sin ils plans dalla megliraziun da funs. Quei aspect vegn sustenius da Marcel Soliva, cun la remarca dad esser plitost precauts cun las indicaziuns sin quels plans.

Plinavon vegn susteniu l'idea da mantener baghetgs e faners en decadenza ch'ei spatitschai per la val ed ein in relasch historic ella tradiziun dalla cultura d'agricultura en nossa val. Menziunaus vegn sco exempel il baghetg o la Tscheppa, seniester dalla senda dad Bugnei viers Mustér.

Norbert Berther fa attents sin la voluminusa biblioteca da Vic Hendry ch'ei vegnida schenghegiada igl onn vargau alla vischnaunca. La situaziun actuala cuntenta buca el. Danovamein ei la biblioteca vegnida dislocada ella aula dalla casa da scola a Sedrun. Ina biblioteca, aschia argumentescha Norbert, duei esser cheu per saver duvra. Sco liug ideal vesa el era la pussevividad da far diever per quella la casa da scola a Rueras.

Plinavon fa Norbert Berther attents sin ina nova publicaziun en fuorma d'ina autobiografia scretta da Castgina Deflorin-Berther, cul tetel "Resun d'affonza", che vegn presentada damaun, ils 22 da november 2008 el museum La Truaisch a Sedrun.

Geraua Evelina Soliva-Flepp, responsabla en suprastonza per la cultura da nossa val, admetta alla suprastonza dil forum in engraziament per igl engaschament en favur dalla cultura indigena, pil manteniment e promoziun. Il program relati da gronda activitad ed engaschi.

Suenter ina fetg interessanta radunonza, cun ina discussiun fetg activa e positiva, cun interessants votums ed ideas, mo era cun in mussament da bia simpatia e sensibilitad e responsabladad per cultura indigena, siara il president dil forum la serada cun engraziar a mintgin, giavischond vinavon engaschi ed in egl aviert per la cultura tuatschina.

Sedrun, ils 5 da december 2008

Igl actuar

Tarcisi Hendry